



DAWLADDA PUNTLAND EE SOOMAALIYA
WASAARADDA MAALIYADDA

XEERKA QOONDADA MIISAANIYADDA
2022

GAROOWE, NOVEMBER, 2021

Tusmo**Bogga**

Qodobka 1-aad	3
Erey Bixin	3
Qodobka 2-aad.....	3
Magaca Xeerka.....	3
Qodobka 3-aad.....	3
Ujeeddada Xeerka	3
Qodobka 4-aad.....	4
Qoondeynta Miisaaniyadda.....	4
Qodobka 5-aad	4
Maamulka Miisaaniyadda	4
Qodobka 6-aad.....	5
Mudnaanta Kharash Bixin	5
Qodobka 7-aad	5
Furista Xisaabaha iyo Xareynta Lacagaha	5
Qodobka 8-aad.....	5
Ka Saaridda Lacagaha ee Khasnadda Guud	5
Qodobka 9-aad.....	6
Bixinta Lacagaha Agabka iyo Adeegga	6
Qodobka 10-aad	6
Haraagga Miisaaniyadda ee aan la isticmaalin.....	6
Qodobka 11-aad	6
Warbixin Xisaabeedka Hay'adaha Dawladda.....	6
Qodobka 12-aad.....	6
Dhaqangalka Xeerka.....	6

Qodobka 1-aad

Erey Bixin

Ereyada hoos ku qoran haddii aan xeerkani si kale u qeexin waxaa loola jeedaa:

- Wasiir:** Waxaa loola jeedaa Wasiirka Wasaaradda Maaliyadda Dawladda Puntland.
- Wasaarad:** Waxaa loola jeedaa Wasaaradda Maaliyadda Dawladda Puntland.
- Xeer:** Waxaa loola jeedaa Xeerka Qoondada Miisaaniyadda Dawladda Puntland.
- Kala-wareejin:** Waxaa loola jeedaa oggolaanshaha kala wareejinta Miisaaniyadda la qoondeeyey, lagana wareejinayo madax-xige, farac ama mashruuc loona wareejiyo mid kale.
- Qaansheegato:** Waxaa loola jeedaa shirkadaha ama shaqsiyaadka hay'adaha dowladda siiya adeeg ama agab.
- Qoondayn:** Waxaa loola jeedaa oggolaanshaha Golaha Wakillada si lacag looga saaro Sanduuqa Guud ee Miisaaniyadda.
- Ansixin:** Waxaa loola jeedaa oggolaanshaha Wasiirka ee kharash si waafaqasan Miisaaniyadda Golaha Wakiilladu ansixiyey.
- Ballanqaad** (commitment): Waxaa loola jeedaa heshiis waajib yeelaya qaan marka heshiis la galo.

Qodobka 2-aad

Magaca Xeerka

Xeerkan waxaa lagu magacaabaa Xeerka Qoondada Miisaaniyadda Dawladda Puntland ee 2022.

Qodobka 3-aad

Ujeeddada Xeerka

Ujeeddada xeerkani waa;

1. In lagu dhaqan-geliyo Miisaaniyadda dawladda Puntland ee bilaabmaysa Janaayo 1, 2022, dhammaanaysana Disembar 31, 2022 si waafaqsan Qodobka 135-aad farqadiisa 4-aad ee Dastuurka Dawladda Puntland
2. In lagu awood siiyo Wasiirka inuu fasaxo ama ka saari karo khasnadda guud ee dawladda lacagta loo qoondeeyey oo dhan \$136,993,200 sannadkii, marka ay soo codsadaan xafiisyada dawladdu, si loogu daboolo kharashaadka Dawladda.

Qodobka 4-aad

Qoondoynta Miisaaniyadda

1. Si loo meel mariyo howlaha iyo siyaasadaha Dowladda Puntland ee sannad Miisaaniyadeedka bilaabanaya Jannaayo 1, 2022 dhammaanayana Deseember 31, 2022, Xeerkan wuxuu u qoondeeyey Wasiirka Maaliyaddu inuu ka saari karo Khasnadda Guud ee Miisaaniyadda Dowladda lacag dhan **USD 136,993,200** sannadkii sida uu qabo qodobka 3-aad Xeerkan.
2. Wadarta Guud ee laga qoondeeyey Sanduuqa Guud ee Miisaaniyadda 2022 **USD 136,993,200**. loona jajabiyey sida soo socota:
B) Kharashka joogtada ah waxaa loo qoondeeyey **USD 104,366,378**
T) Maalgelinta Raasumaalka waxaa loo qoondeeyey **USD 32,626,822**

Qodobka 5-aad

Maamulka Miisaaniyadda

1. Wasiirku wuxuu oggolaan karaa kala wareejinta miisaaniyadda joogtada ah (aan rasumaalka ahayn) ee hal hay'ad dawladeed ka dib marka hay'addu soo codsato iyadoo soo raacinaysa qoraal sababaysan.
2. Kala wareejinta miisaaniyadda joogtada ah iyo tan raasumaalka ee laba hay'adood wuxuu wasiirku wareejin karaa marka uu helo oggolaanshaha Golaha Wakiillada.
3. Wasiirka ayaa oggolaan kara in Miisaaniyadda kaydka (Lama filaanka) loo wareejiyo loona isticmaalo kharashyada deg-dega ah kadib marka ay dhacaan hawlo lama filaan ah una baahan gurmada deg-deg ah oo aan baahidooda markii hore Miisaaniyadda lagu muujin.
4. Wasiirka ayaa si joogta ah ugu warbixin doona Golaha Wakiillada kharashka laga wareejiyey madaxa kharashka lama filaanka ah
5. Kharashka lama filaanka ah looma isticmaali karo waxaan ka ahayn xaalad deg-deg ah, taas oo markii Miisaaniyadda la diyaarinayey aan muuqan.
6. Amaahda loo arkay inay sharci tahay taasoo laga soo wareejiyey sannad Miisaaniyadeedyadii hore waa la diiwaan gelinayaa, waxaana loo wareejinayaa sannad Miisaaniyadeedka 2022 iyadoo loola dhaqmayo sida inay tahay qeyb ka mid ah Miisaaniyadda kharashka. Dib-u-eegis ayaa Wasaaraddu ku sameynaysaa si loo hubiyo loona diiwaan geliyo.

Qodobka 6-aad

Mudnaanta Kharash Bixin

1. Bixinta lacagta kharashyada sannad Miisaaniyadeedka 2022 loogu tala galay waxaa loo isticmaali karaa oo kaliya ujeedooyinka ku qeexan xeerkan.
2. Haddii ciriiri dhanka Maaliyadda ahi timaaddo mudnaanta kharashka Miisaaniyadda waxaa loo kala hormarsiinayaa sida soo socota;
 - Raashinka iyo Gunnooyinka Ciidamada qalabka sida.
 - Gunnada Xildhibaanada iyo G/Wasiirada.
 - Mushaarooyinka iyo gunnooyinka Shaqaalaha Rayidka ah.
 - Kharashka Adeegga iyo Agabka Hay'adaha Dowladda
 - Deymanka Mushaharka iyo gunnooyinka kasoo wareegay Miisaaniyadda sannadkii hore haddii ay jiraan.
 - Qaamaha iyo deymaha.

Qodobka 7-aad

Furista Xisaabaha iyo Xareynta Lacagaha

1. Dakhliga Dowladda waa in la dhigaa Bangiga Dowladda Puntland 24 saac gudahood laga bilaabo marka la qabto.
2. Meelaha aysan ka jirin laan Bangi, Wasiirku isagoo u wakiilanaya Xisaabiyaha Guud wuxuu amrayaa ka furista xisaabo bankiyada ganacsiga si wafaaqsan qodobka 91aad ee Xeerka Maamulka iyo Maaliyadda (1962).
3. Bangiga Dowladda Puntland wuxuu aqbalayaa qabashada dakhliga dowladda iyo bixinta kharashyada dowladda.
4. Lama xiri karo xisaab bangi ayadoo aan oggolaansho laga helin Wasiirka.

Qodobka 8-aad

Ka Saaridda Lacagaha ee Khasnadda Guud

1. Lacag lagama saari karo Khasnadda guud ee Dawladda iyadoo aan la ansixin Miisaaniyada 2022. Hase ahaatee, hadii Golaha Wakiilladu ansixin waayo Miisaaniyaddan sabab kasta ha ku timaadee, waxaa muddo bil ah lagu sii dhaqmayaa Miisaaniyadda sannadkii hore sida ku cad qodobka 135-aad ee dastuurka Puntland.
2. Lama geli karo wax kharash ah ka hor qoondaynta Miisaaniyadda.
3. Dhammaan dhaqdhaqaaqyada dakhliga iyo kharashyada waa in loo maraa nidaamka Maareynta Macluumaadka Maaliyadda Puntland (PLFMIS) xisaabahana la waafajiyaa warbxin xisaabeedka Bangiga Dowladda Puntland.
4. Dhammaan lacagaha qaansheegta waa in toos loogu diraa cidda leh ayadoo aan loo marinayn hey'adaha ama xafiisyada adeegga.

Sanduuqa Lacagaha gacan ku haynta (Petty Cash Fund) waxaa ansixinaya Wasiirka, waxaana xadidaaya jaangoynta wasiirka.

Qodobka 9-aad

Bixinta Lacagaha Agabka iyo Adeegga

1. Ayadoo ay weheliyaan caddeymaha iyo foojarada lacag bixinta ee loo baahan yahay, hey'adina lacag ma bixin karto iyadoo uusan madaxa xafiiska ama ciddii kale ee u wakiisho xaqiijin:
 - b) In Lacag bixintu tahay mid la xariirta hawl qabasho u baahan, adeeg ama allaab keenis.
 - t) In shaqada la qabtay, allaabta la keenay ama adeegga la bixiyay & qiimaha la dalacay yihiin kuwo waafaqsan heeshiiska ama mid macquul ah haddii aysan heshiiska ku caddeyn.
 - j) In ay noqoto mid-waafaqsan shuruudaha heeshiiska kharash bixinta, ka hor inta aan la dhammaystirin shaqada, allaabta lala wareegin ama adeegga la helin
2. Lacag bixintu waa inay ahaataa mid waafaqsan nidaamka maamulka iyo maaliyadda iyo awaamiirta u degsan Wasaaradda

Qodobka 10-aad

Haraagga Miisaaniyadda ee aan la isticmaalin

Haraaga Miisaaniyada la qoondeeyey waxaa loo wareejinayaa sanad misaaniyadeedka xiga kan dhamaaday, iyadoo la dhigaayo Khasanadda Guud Dowladda (Bangiga Dowladda Puntland) ama Xisaabaha kale ee Wasaaraddu hore ogolaatay.

Qodobka 11-aad

Warbixin Xisaabeedka Hay'adaha Dowladda

Dhammaan hey'adaha dowladdu waa inay, isla toban casho gudahood dhammaadka bilkasta, warbixinahooda dhakliga iyo kharashka usoo gudbiyaan Xafiiska Xisaabiyaha Guud ayadoo la raacayo wareegtada wasiirka ee qaabka loo soo gudbinayo

Qodobka 12-aad

Dhaqangalka Xeerka

Xeerkani wuxuu dhaqan galayaa marka golaha Wakiilladu ansixiyo, madaxweynuhuna saxiixo, laguna Soo saaro faafinta rasmiga ah ee Dowladda.